

支那  
史述

釋迦譜

卷之四



6  
13  
4

遼通文庫  
文庫 6  
194  
4



真出家。非出家。皆心為本。  
外道有羅漢果。又五帝。

十二因緣生滅之相。

如來初成七日思惟。

捨可愛妻子以供養夜叉。

石鉢。鐵鉢。

龍目得開。受三白歸。

辟如子稱父母名於世。似中尚不可。離苦樂中道。

解知四諦故。名阿若憍陳如。

佛阿羅漢。四諦法輪。五阿羅漢。

釋迦譜卷第四

蕭

齊

釋

僧

祐

譔

釋迦降生釋種成佛緣譜第四之四

出因

爾時菩薩以慈心力。於二月七日夜降伏魔。已放太

光明。即便入定。思惟真諦。於諸法中。禪定自在。悉知

過去所造善惡。從此生彼。父母眷屬貧富貴賤壽命

長短及名姓字。皆悉明了。即於衆生起大悲心。而自

念言。一切衆生無救濟者。輪迴五道。不知出津。皆悉

虛偽。無有真實。而於其中橫生苦樂。作是思惟。至中

夜盡。瑞應本起。云是日初夜得一術。闇自知宿命。無



數劫已來精神所更展轉受身不可計數皆識知之  
至二夜時得一術闇悉知衆生心中所念善惡殃福  
生死所趣至三夜時得二術闇漏盡結解自知本昔  
久所習行四神足念精進定欲定意定戒定變化法  
所欲如意不復用思身能飛行能分一身作百作千  
至億萬無數復合爲一能徹入地石壁皆過從一方  
現俯沒仰出譬如水波能中出水履水行虛身不陷  
墜坐臥空中如飛鳥翔立能及天手捫日月涌身平  
立至梵自在眼能徹視耳能洞聽意預知諸夫人龍  
鬼神蚊行蠕動之類身行口意言心所欲念悉見聞

知諸有貪婬無貪婬者有瞋恚無瞋恚者有愚癡無  
愚癡者有愛欲無愛欲者有大志行無大志行者有  
內外行無內外行者有念善不念善者有一心無一  
心者有解脫意無解脫意者一切悉知菩薩觀天上  
人中地獄畜生鬼神五道先世父母兄弟妻子中外  
姓字一一分別一世十世百千億萬無數世事至于  
之天地一劫崩壞空荒之時一劫始成人物興時能  
知十劫百劫至于千萬億無數劫中內外姓字衣食  
苦樂壽命長短死此生彼展轉所趣從上頭始諸所  
更身生長老終形色好醜賢愚苦樂一切三界皆分



別知見人、鬼神各自隨行，生五道中，或墮地獄，或墮畜生，或作鬼神，或生天上，或入人形，有生豪貴富樂家者，有生卑鄙貧賤家者，知衆生惑五陰、自蔽一色像、一痛癢、三思想、四行作五、覓識皆習五欲、眼貪色耳貪聲、鼻貪香、舌貪味、身貪細滑，爲愛欲所牽，惑於財色，思望安樂，從是生諸惡本，從惡致苦，能斷愛習，不隨姪心，大如毛髮，受行八道，則終苦滅，譬如無薪亦復無火，是謂無爲度世之道。菩薩自知已棄惡本，無姪怒癡，生死已除，根種悉斷，無餘栽蘖，所作已成，智慧已了，明星出時，霍然大悟，得無上正真之道，爲

取正覺得佛十八法，有十神力，四無所畏。

爾時菩薩既至中夜，卽得天眼，觀察世間，皆悉徹見。如明鏡中自觀面像，見諸衆生種類無量，死此生彼，隨行善惡，受苦樂報。見地獄中，考治衆生，或洋銅灌口，或抱銅柱，或臥鐵牀，或以鐵鑊而煎煮之，或以火上而加弗炙，或爲虎狼鷹犬所食，或有避火依於樹下，樹葉墮落，皆成刀劍，割截其身，或以斧鋸解剥肢體，或擲熱沸灰河之中，或復擲熱糞屎坑中，受如是等種種諸苦，以業報故，命終不死。菩薩既見如此事，已而心思惟此等衆生，本造惡業，爲世樂，故而今得



果極爲大苦。若人有見如此惡報無復更應作不善想。爾時菩薩復觀畜生隨種種行受雜醜形。或復有爲骨肉筋角皮牙毛羽而受殺者。或復爲人負荷重擔。饑渴乏極。人無知者。或穿其鼻。或鉤其首。常以身肉而供於人。還與其類更相食噉。受於如是種種之苦。菩薩既見生大悲心。卽自思惟。斯等衆生恒以身力而供於人。又加楚撻饑渴之苦。皆是本修惡行果報。爾時菩薩次觀餓鬼。見其恒居黑暗之中。未曾暫覩日月之光。還是其類亦不相見受形。長大腹如大山。咽頸若鍼。口中恒有大火熾然。常爲饑渴之所煎。

迫千億萬歲。不聞食聲。設值天雨。灑其上者。變成火珠。或時過臨江海河池水。卽化爲熱銅焦炭。動身舉步聲如人牽五百乘車。肢體節節皆悉火然。菩薩既見受如是等種種諸苦起大悲心。而自思惟。斯等皆爲本造慳貪積財不施。故令今者受斯罪報。若人見彼受此苦痛。宜應惠施。勿生憝惜。設使無財。亦應割肉以用布施。爾時菩薩次復觀人見從中陰始欲入胎。父母和合以顛倒想起於愛心。卽以不淨而爲已身。旣處胎已。在於生熟二藏之間。熏炙身體如地獄苦。至滿十月。



然後方生初生之時而爲外人之所抱執麤澀苦痛如被刀劒如是不久復歸老死更爲嬰兒輪轉五道不能自悟菩薩見已起大悲心而自思惟衆生皆有如斯之患云何於中耽著五欲橫計爲樂而不能斷顛倒根本

爾時菩薩次觀諸天見彼天子其身清淨不受塵垢如真瑠璃有大光明而目不瞬或有居在須彌山頂或復居在須彌四嶺或復居在虛空之中心常歡悅無不適事奏天美樂以自娛樂不識晝夜四方諸趣無不絕妙視東耽著彌歲忘轉瞻西流瀕經年不迴

五死相現

乃至南北皆亦如是飲食衣服應念卽至雖有如此適意之事猶爲欲火之所煎焦又見彼天福盡之時五死相現一者頭上華萎二者眼瞬三者身上光滅四者腋下汗出五者自然離於本座其諸眷屬見天子身五死相現心生戀慕天子亦復自見已身有五死相又見眷屬戀慕於已當爾之時生太苦惱菩薩既見彼諸天子有如此事起太悲心而自思惟此諸天子本修少善得受天樂果報將盡生太苦惱既命終已捨彼天身或有墜於三惡道中本造善行爲求樂報而今所得少樂多苦譬如饑人噉雜毒食初雖



爲美終成大患云何智者貪樂此也色無色界諸天見壽命長便謂常樂既見變壞生大苦惱卽起邪見謂無因果以此事故輪迴三塗備受諸苦菩薩以天眼力觀察五道起大悲心而自思惟三界之中無有一樂如是思惟至中夜盡爾時菩薩至第三夜觀衆生性以何因緣而有老死卽知老死以生爲本若離於生則無老死又復此生不從天生不從自生非無緣生從因緣生因於欲有色有無色有業生又觀三有業從何而生卽知三有業從四取生又觀四取從何而生卽知四取從愛而生又復觀愛從何而生卽

便知愛從受而生又復觀受從何而生卽便知受從觸而生又復觀觸從何而生卽便知觸從六入生又觀六入從何而生卽知六入從名色生又觀名色從何而生卽知名色從識而生又復觀識從何而生卽便知識從行而生又復觀行從何而生卽便知行從無明生若滅無明則行滅行滅則識滅識滅則名色滅名色滅則六入滅六入滅則觸滅觸滅則受滅受滅則愛滅愛滅則取滅取滅則有滅有滅則生滅生滅則老死憂悲苦惱滅如是逆順觀十二因緣第三夜分破於無明明相出時得智慧光斷於習障成一



切種智爾時如來心自思惟八正聖道是三世諸佛之所履行趣般涅槃路我今已踐智慧通達無所罣礙于時大地十八相動遊霞飛塵皆悉澄淨天鼓自然而發妙聲香風徐起柔軟清涼雜色瑞雲降甘露雨園林華果榮不待時又雨曼陀羅華摩訶曼陀羅華曼殊沙華摩訶曼殊沙華金華銀華瑠璃等華七寶蓮華繞菩提樹滿三十六踰闍那是時諸天作天妓樂散華燒香歌唄讚歎執天寶蓋及以幢幡充塞虛空供養如來龍神八部所設供養亦復如是當爾之時一切衆生皆悉慈愛無瞋害想歡喜踊躍如見

聖跡無怖畏情其心調柔離憍慢意亦無慳嫉諂誑之心五淨居天離喜樂根亦皆歡悅不能自勝地獄苦痛暫得休息生大歡喜一切畜生相食噉者無復惡心餓鬼飽滿無饑渴想世界之中幽暝之處日月威光所不能照而皆大明其中衆生悉得相見各作是言此中云何忽有衆生太聖法主出興於世以太法光破非法暗故令一切皆悉明朗甘蔗先王棄國學道得五通仙又行十善得生天者皆乘神通到菩提樹在虛空中歡喜合掌而讚歎言於我甘蔗種族之中能斷諸漏成一切智爲世間眼甚爲奇特一切



人天莫不歡喜踊躍無量唯有魔王心猶憂愁  
爾時如來於七日中一心思惟觀於樹王而自念言  
我在此處盡一切漏所作已竟本願成滿我所得法  
甚深難解唯佛與佛乃能知之一切衆生於五濁世  
爲貪欲瞋恚愚癡邪見憍慢諂曲之所覆障薄福鈍  
根無有智慧云何能解我所得法今我若爲轉法輪  
者彼必迷惑不能信受而生誹謗當墮惡道受諸苦  
痛我寧默然入般涅槃爾時如來以偈頌曰  
聖道甚難登 智慧果難得 我於此難中  
皆悉已能辦 我所得智慧 微妙寂第一

衆生諸根鈍 著樂癡所盲 順於生死流  
不能返其源 如斯之等類 云何而可度  
爾時如來作是念已大梵天王見於如來聖果已成  
默然而住不轉法輪心懷憂惱即自念言世尊昔於  
無量億劫爲衆生故久在生死捨國城妻子頭目髓  
腦備受衆苦始於今者所願滿足成阿耨多羅三藐  
三菩提云何默然而不說法衆生長夜沉沒生死我  
今當往請轉法輪作是念已即發天宮猶如壯士屈  
伸臂頃至如來所頭面禮足繞百千匝却住一面胡  
跪合掌而白佛言世尊往昔爲衆生故久住生死捨



身頭目以用布施備受諸苦廣修德本始於今者成無上道云何默然而不說法衆生長夜沒溺生死墮無明暗出斯甚難然有衆生過去世時親近善友植諸德本堪任聞法受於聖道唯願世尊爲斯等故以太悲力轉妙法輪釋提桓因乃至他化自在天亦復如是勸請如來爲諸衆生轉大法輪

爾時世尊答大梵王及釋提桓因等言我亦欲爲一切衆生轉於法輪但所得法微妙甚深難解難知諸衆生等不能信受生誹謗心墮於地獄我今爲此故默然耳時梵天王等乃至三請爾時如來至滿七日

默然受之梵天王等知佛受請頭面禮足各還所住賢愚經云佛在摩竭國善勝道場初始得佛念諸衆生迷網邪倒難可教化若我住世於事無益不如遷逝無餘涅槃爾時梵天知佛所念卽從天下前詣佛所頭面禮足長跪合掌勸請世尊轉于法輪佛答梵天衆生之類塵垢所蔽樂著世樂無有慧心若我住世唐勞其功如吾所念唯滅爲快爾時梵天復更傾側而白佛言世尊今日法海已滿法幢已立潤濟開導今正是時又諸衆生應可度者亦甚衆多云何世尊欲入涅槃使此萌類永失覆護世尊先昔無數劫



時恒爲衆生采集法樂乃至一偈以身妻子而用募求云何不念便欲孤棄過去久遠於閻浮提作大國王號脩樓婆領此世界八萬四千諸小國邑六萬山川八十億聚落王有二萬夫人一萬大臣時妙色王德力無比覆育民物豐樂無極王心念曰如我今者唯以財寶資給一切無有道教而安立之此是我答何其苦哉今當推求堅實法財普令得服卽時宣令閻浮提內誰能有法與我說者恣其所得不敢違逆募出周徧無有應者時王憂愁酸切懇惻毗沙門王見其如是欲往試之轉自變身化作夜叉色貌青黑

眼赤如血狗牙上出頭髮悉豎火從口出來詣宮門口自宣言誰欲聞法我當爲說王聞是語喜不自勝躬自出迎前爲作禮敷施高座請令就坐卽集羣僚前後圍繞欲得聽聞爾時夜叉復告王曰學法事難云何直爾欲得聞知王叉手曰一切所須不敢有通夜叉報曰若以太王可愛妻子與我食者乃可與法爾時太王以所愛夫人及兒中勝者供養夜叉夜叉得已於高座上衆會之中取而食之爾時諸王百官羣臣見王如是啼哭懊惱宛轉在地勸請太王令捨此事王爲法故心堅不迴時夜叉鬼食妻子盡爲說



一偈

一切行無常 生者皆有苦 五陰空無相 無有我我所

說是偈已王大歡喜心無悔恨大如毛髮即使盡寫遣使頒示閻浮提內咸使誦習世尊往昔為於衆生不顧身命乃至如是今者世尊法海已滿法幢已立法鼓已建法炬已照潤益成立今正得時云何欲捨一切衆生入於涅槃而不說法爾時梵王於如來前合掌讚歎說於如來先身求法為於衆生凡有千首世尊爾時受梵王請即便往詣波羅柰國鹿野苑中

轉于法輪三寶因是乃現於世時諸天人諸龍鬼神八部之衆聞說是已莫不歡喜普曜經云如來具足成正覺已移坐石室自念本願欲度衆生思惟生死世間道術九十六種各信所事孰知其惑天地無常皆悉太苦誰能信者意欲默然不為說法便入定意時天帝釋知佛不欲說法悲念三界即將般遮下到石室鼓琴歌佛本願請說不死之法佛隨俗心是法甚深非心所思非言可暢即說偈言  
深奧恬怕 明耀無垢 吾以遂是 甘露無為  
今我說之 衆人不解 如吾今日 不如默然



除去言辭。無思無得。如是自然。猶如虛空。  
時識伽梵王與六萬八千梵來到佛所。白佛言。天地  
無祐。今欲毀壞。佛不說法。衆苦沉滯。沒於三界。願轉  
法輪。悉救衆生。佛默可之。時有樹神名曰法明。又名  
法樂。又名法意。又名持法。白佛言。世尊當於何處而  
轉法輪。佛言。在波羅柰仙人住處鹿苑之中。人民雖  
少。我宿命時在中建立法祠。六萬億載在中供養。六  
萬億諸佛諸仙人等遊居其中。以佛道眼普觀世間。  
今當爲誰第一說法。何人易化。姪怒癡薄。鬱是藍弗  
三垢。渺薄身故已來。已經七日。第二學仙。今日壽終。

佛復念言。昔父王遣五人俱侍衛。我經歷勤苦。我今  
寧可爲其先說。  
爾時世尊從樹下起。尋時舉聲告於三千大千世界  
皆使知之。至波羅柰諸五人所。於是五人遙見佛來。  
轉相謂言。沙門瞿曇迷失無定所志。不獲假使來者。  
慎莫爲起。亦勿迎逆。彼時五人遙見佛到。不能堪任。  
不安。所坐卽起。歸敬。  
爾時地神暢聲告已。卽爲立座。頌宣廣說十二因緣。  
拘隣音知佛法聖衆卽成三寶。名暢天下。音徹梵天。  
本際也俱隣五人六十億天八十億色界天八萬世人得法。



眼淨

爾時世尊受梵王等請已又於七日而以佛眼觀諸衆生上中下根及諸煩惱亦下中上滿二七日爾時世尊又復思惟我今當開甘露法門誰應在先而得聞者阿羅邏仙人聰慧易悟又先發願道成度我作是念時空中有言阿羅邏仙人昨夜命終爾時世尊即便答彼空中聲言我亦知其昨夜命終又自思惟迦蘭仙人利根明了亦應先聞空中又言迦蘭仙人昨夜命終爾時世尊即以答言我亦知其昨夜命終爾時世尊又自思惟彼王師大臣所遣憍陳如等五

人瞻視我者皆悉聰明又過去世於我發願應先聞法我今宜當爲此五人先開法門又自思惟古昔諸佛轉法輪處皆悉在於波羅柰國鹿野苑中仙人住處又此五人所止住處亦在於彼我今應往至其住處轉大法輪思惟是已即從座起詣波羅柰國爾時有五百商人二人爲主一名跋陀羅斯那二名跋陀羅梨行過曠野時有天神而語之言有如來應正徧知明行足善逝世間解無上士調御丈夫天人師佛世尊出興於世最上福田汝今宜應最前設供時彼商人聞天語已即答之曰善哉如告又問天言世尊



今者爲在何許天又報言世尊不久當來至此於是如來於無量諸天前後導從到多謂婆跋利村時彼村人既見如來威相莊嚴又見諸天前後圍繞倍生歡喜卽以蜜麩而奉上佛爾時世尊心自思惟過去諸佛用鉢多羅而以盛食時四天王知佛心念各持一鉢來至佛所而以奉上於是世尊而自念言我今若受一王鉢者餘王必當生於恨心卽便普受四王之鉢累置掌上按令成一使四際相現爾時世尊卽便呪願今所布施欲令食者得充氣力當令施者得色得力得瞻得喜安快無病終保年壽諸善鬼神恒

隨守護開示道地得利諸偶吉無不利日月五星二十八宿天神鬼王常隨護助四天大王賞別善人飯食布施斷三毒根將來當獲三堅法報聰明智慧篤信佛法在在所生正見不昧現世之中父母妻子親戚眷屬皆悉熾盛無諸災恠不吉祥事門族之中若有命過墮惡道者當令以今所施之福還生人天不起邪見增進功德常得奉近諸佛如來得聞妙說見諦得證所願具足爾時世尊呪願訖已卽便受食食旣畢竟澡漱洗鉢卽授商人三歸一歸依佛二歸依法三歸依當來僧授三歸竟因與之別瑞應本起云



佛定意七日不動不搖樹神念佛新得道快坐已七日未有獻食者我當求人令獻佛食時有五百賈人從山一面過車牛皆躓礙不行中有兩大人一名提謂二名波利怖還與衆人俱詣樹神請福神現光像言今世有佛在此優留國界尼連禪水邊未有獻食者汝曹幸先能有善意必獲大福賈人聞佛名皆喜言佛必獨大尊天神所敬非凡品也卽和麩蜜俱詣樹下稽首上佛佛念先古諸佛哀受人施法皆持鉢不宜如餘道人手受食也四天主卽遙知佛當用鉢如人屈伸臂頃俱到須那山上如意所念石中自然

出四鉢香潔無穢四天王各取一鉢還共上佛願哀賈人令得太福方有鐵鉢後弟子常用食佛念取一鉢不快餘王意便悉受四鉢累置左手中右手按之合成一鉢令四際現而便前行威儀詳序步若鷲王路逢外道名優波伽旣見如來相好莊嚴諸根寂定歎爲奇特卽說偈言

世間諸衆生	皆爲三毒縛	諸根又輕躁
馳蕩於外境	而今見仁者	諸根極寂靜
必到解脫地	決定無有疑	仁者所學師
其姓字何等		



爾時世尊以偈答曰

我今已超出	一切衆生表	微妙深遠法
我今已具足	三毒五欲境	永斷無餘習
如蓮華在水	不染濁水泥	自悟入正道
無師無等侶	如清淨智慧	降伏大力魔
今得成正覺	堪爲天人師	身口意滿足
故號爲牟尼	欲趣波羅柰	轉甘露法輪
是天人魔梵	所可不能轉	

爾時優波伽聞此偈言心生歡喜歎未曾有合掌恭敬圍繞而去迴顧瞻矚不見乃去爾時世尊卽復前

行次到阿閼婆羅水側日暮止宿而便入定當於爾時七日風雨時彼水中有大龍王名曰眞隣陀見佛入定卽以其身圍繞七匝滿七日已時彼龍王化爲人形頭面禮足而白佛言世尊在此七日之中不至乃甚患風雨也爾時世尊以偈答曰

諸天及世人  
所歎五欲樂  
比我禪定樂  
不可爲譬類

時彼龍王聞佛此偈歡喜踊躍頭面禮足還歸所止瑞應本起云起到文隣音龍無提水邊坐定七日不喘不息光照水中龍目得開卽識如來如前三佛光



明日輒得視龍王歡喜沐浴名香栴檀蘇合出冰見  
佛相好光影如樹有華前繞佛七匝身離佛圍四十  
里龍有七頭羅覆佛上欲以障蔽蚊蚋寒暑時雨七  
日龍一心不饑不渴七日雨止佛從定寤龍化作年  
少道人著好服飾稽首問佛佛得無寒得無熱無為  
蚊蚋所燒近耶佛時答言

久得在屏處	思道其福快	昔所願欲聞
今已悉知快	不為彼所燒	能安衆生快
度世三毒滅	得佛泥洹快	生世得親佛
聞受經法快	得與辟支佛	真人會亦快

不與愚從事 得離惡人快 有黠別真偽

知信正道快

佛告龍王汝當復自歸於佛自歸於法自歸於比丘  
僧即受三自歸諸畜生中是龍為先見佛  
爾時世尊即復前往波羅柰國至憍陳如摩訶那摩  
跋波阿捨婆闍陀羅闍所止住處時彼五人遙見  
佛來共相謂言沙門瞿曇棄捨苦行而還退受飲食  
之樂無復道心今既來此我等不須起迎之也亦勿  
作禮敬問所須為敷坐處若欲坐者自隨其意作此  
語竟而各默然爾時世尊既來至已五人不覺各從



座起禮拜奉迎互爲執事或復有爲持衣鉢者或有取水供盥漱者或復有爲澡洗脚者各違本誓猶故稱佛以爲瞿曇爾時世尊語憍陳如言汝等共約見我不起今者何故違先所誓而卽驚起爲我執事時彼五人聞佛此言深生慚愧卽前白言瞿曇行道得無疲倦爾時世尊語五人言汝等云何於無上尊而以高情稱喚姓也我心如空於諸毀譽無所分別但汝憍慢自招惡報譬如有子稱父母名於世儀中猶尚不可況我今是一切父母時彼五人又聞此語倍生慚愧而白佛言我等愚癡無有慧識不知今者已

成正覺所以者何往見如來日食麻米苦行六年而今還受飲食之樂我以是故謂不得道爾時世尊語憍陳如言汝等莫以小智輕量我道成與不成何以故形在苦者心則憊亂身在樂者情則樂著是以苦樂兩非道因譬如鑽火澆之以水則必無有破暗之照鑽智慧火亦復如是若有苦樂水慧光不生以不生故不能滅於生死黑障今者若能棄捨苦樂行於中道心則寂定堪能修彼入正聖道離於生老病死之患我已隨順中道之行得成阿耨多羅三藐三菩提時彼五人旣聞如來如此之言心大歡喜踊躍無量



瞻仰尊顏目不暫捨爾時世尊觀五人根堪任受道而語之言憍陳如汝等當觀五盛陰苦生苦老苦病苦死苦愛別離苦怨憎會苦所求不得苦失榮樂苦憍陳如有形無形無足一足二足四足多足一切衆生無不悉有如此苦者譬如以灰覆於火上若遇乾草還復燒然如是諸苦由我爲本若有衆生起微我想還復更受如此之苦貪欲瞋恚及以愚癡皆悉緣我根本而生又此三毒是諸苦因猶如種子能生於芽衆生以是輪迴三有若滅我想及貪瞋癡諸苦亦皆從此而斷莫不悉由彼入正道如人以水澆於盛

火一切衆生不知諸苦之根本者皆悉輪迴在於生死憍陳如苦應知集當斷滅應證道當修憍陳如我已知苦已斷集已證滅已修道故得阿耨多羅三藐三菩提是故汝今應當知苦斷集證滅修道若人不知四聖諦者當知是人不得解脫四聖諦者是真是實苦實是苦集實是集滅實是滅道實是道憍陳如汝等解未憍陳如言解已世尊知已世尊以於四諦得解知故故名阿若憍陳如當三轉四諦十二行法輪時阿若憍陳如於諸法中遠塵離垢得法眼淨時虛空中八萬那由他諸天亦離塵垢得法眼淨



爾時地神見於如來在其境界而轉法輪心大歡喜  
高聲唱言如來於此轉妙法輪虛空天神既聞此言  
又生踊躍展轉唱聲乃至阿迦膩吒天諸天聞已欣  
悅無量高聲唱言如來今日於波羅柰國鹿野苑中  
仙人住處轉大法輪一切世間天人魔梵沙門婆羅  
門所不能轉爾時大地十八相動天龍八部於虛空  
中作衆妓樂天鼓自鳴燒衆名香散諸妙華寶幢旛  
蓋歌唄讚歎世界之中自然大明阿若憍陳如於弟  
子中以始悟故爲第一弟子時彼摩訶那摩等四人  
聞佛轉法輪已阿若憍陳如獨悟道跡心自念言世

尊若更爲我說法我等亦當復得悟道作此念已瞻  
仰尊顏目不暫捨爾時世尊知四人念即便重爲廣  
說四諦于時四人於諸法中亦離塵垢得法眼淨時  
彼五人見道跡已頂禮佛足而白佛言世尊我等五  
人已見道跡已證道跡我等今者欲於佛法出家修  
道唯願世尊慈愍聽許於時世尊喚彼五人善來比  
丘鬚髮自落袈裟著身卽成沙門爾時世尊問彼五  
人汝等比丘知色受想行識爲是常爲無常也爲是  
苦爲非苦也爲是空爲非空也爲有我爲無我也時  
五比丘聞佛說是五陰法已漏盡意解成阿羅漢果



卽便答言世尊色受想行識實是無常苦空無我於  
是世間始有六阿羅漢佛阿羅漢是爲佛寶四諦法  
輪是爲法寶五阿羅漢是爲僧寶如是世間三寶具  
足爲諸夫人第一福田

爾時有長者子名曰耶舍聰明利根極大巨富閭浮  
提中最爲第一服天冠瓔珞著無價寶屐其於中夜  
與諸妓女相娛樂已各還寢息忽從眠覺見諸妓女  
或有伏臥或有仰眠頭髮鬢亂涎唾流出樂器服玩  
顛倒縱橫旣見是已生厭離心而自念言我今在此  
災恠之內於不淨中妄生淨想作是念時以天力故

空中光明門自然開尋光而去趣鹿野苑路由恒河  
高聲唱言苦哉苦哉佛言耶舍汝便可來我今此有  
離苦之法耶舍聞已所著寶屐價直閻浮提卽便脫  
之度於恒河往詣佛所見三十二相八十種好顏容  
挺特威德具足心大歡喜踴躍無量五體投地頂禮  
佛足唯願世尊救濟於我佛言善哉善哉善男子諦  
聽諦聽善思念之如來卽便隨順其根而爲說法耶  
舍色受想行識無常苦空無我汝知之不是時耶舍  
聞說此語卽於諸法遠塵離垢得法眼淨於是如來  
重說四諦漏盡意解心得自在成阿羅漢果卽答佛



言世尊色受想行識實是無常苦空無我爾時如來  
猶見耶舍著嚴身具卽說偈言

雖復處居家 服寶嚴身具 善攝諸情根  
厭離於五欲 若能如此者 是爲真出家  
身雖在曠野 服食於麤澀 意猶食五欲  
是爲非出家 一切造善惡 皆從心想生  
是故真出家 皆以心爲本

爾時耶舍既見如來說此偈已心自念言世尊所以  
說此偈者正當以我猶著七寶我今宜應脫如此服  
卽便禮足而白佛言唯願世尊聽我出家佛言善來

比丘鬚髮白落袈裟著身卽成沙門爾時耶舍父既  
至天曉求覓耶舍不知所在心大懊惱悲號涕泣緣  
路推尋到恒河側見其子履心自思惟我子正當從  
此道去卽尋其跡至於佛所爾時世尊知其爲子故  
來至此若使卽得見耶舍者必生大苦或能命終便  
以神力隱耶舍身其父卽便前到佛所頭面禮足退  
坐一面於是如來卽隨其根而爲說法善男子色受  
想行識無常苦空無我汝知之不時耶舍父聞說此  
言卽於諸法遠塵離垢得法眼淨而答佛言世尊色  
受想行識實是無常苦空無我爾時如來既已知其



見於道跡恩愛漸薄而問之言汝何因緣而來至此其卽答言我有一子名曰耶舍昨夜之中忽失所在今日推求見其寶屐在恒河側追尋之跡故來至此爾時世尊攝其神力其父卽便得見耶舍心大歡喜語耶舍言善哉善哉汝爲此事真實快也既能自度又能度他汝今在此故令我來得見道跡卽於佛前受三自歸於是閻浮提中唯此長者爲優婆塞最初獲得供養三寶爾時又有耶舍朋類五十長者于聞佛出世又聞耶舍於佛法中出家修道人各自念言世間今者有無上尊長者子耶舍聰慧辯了才藝兼人

乃能捨其豪族棄五欲樂毀形守志而爲沙門我等今者復何顧戀不出家也作是念已共詣佛所未至之間遙見如來相好殊特光明赫弈心大歡喜舉體清涼敬情轉至卽前佛所合掌圍繞頭面禮足諸長者子宿植德本聰達易悟如來卽便隨其所應而爲說法善男子色受想行識無常苦空無我汝知之不說此語已諸長者子於諸法中遠離塵垢得法眼淨卽答佛言世尊色受想行識實是無常苦空無我唯願世尊聽我出家佛言善來比丘鬚髮自落袈裟著身卽成沙門爾時世尊又爲廣說四諦時五十比丘



漏盡意解得阿羅漢果爾時始有五十阿羅漢是時如來告諸比丘汝等所作已辦堪為世間作上福田宜各遊方教化以慈悲心度諸衆生我今亦當獨往摩竭提國王舍城中度諸人民諸比丘言善哉世尊爾時比丘頭面禮足各持衣鉢辭別而去

爾時世尊即便思惟我今應度何等衆生而能廣利一切人天唯有優樓頻螺迦葉兄弟三人在摩竭提國學於仙道國王臣民皆悉歸信又其聰明利根易悟然其我慢亦難摧伏我今當往而度脫之思惟是已即發波羅柰趣摩竭提國日將昏暮往優樓頻螺

迦葉住處于時迦葉忽見如來相好莊嚴心大歡喜而作是言年少沙門從何而來佛即答言我從波羅柰國當詣摩竭提日既晚暮欲寄一宿迦葉又言寄宿止者甚不相違但諸房舍悉弟子住唯有石室極為潔淨我事火具皆在其中此寂靜處可得相容然有惡龍居在其內恐相害耳佛又答言雖有惡龍但以見借迦葉又言其性兇暴必當相害非是有惜佛又答言但以見借必無辱也迦葉又言若能住者便自隨意佛言善哉即於其夕而入石室結跏趺坐而入三昧爾時惡龍毒心轉盛舉體烟出世尊即入火



光三昧龍見是已火燄衝天焚燒石室迦葉弟子先見此火而還白師彼年少沙門聰明端嚴今爲龍火之所燒害迦葉驚起見彼龍火心懷悲傷卽勅弟子以水澆之水不能滅火更熾盛石室融盡爾時世尊身心不動容顏怡然降彼惡龍使無復毒授三歸依置於鉢中至天明已迦葉師徒俱往佛所年少沙門龍火猛烈將無爲此之所傷也沙門借室我昨所以不相與者正爲此耳佛言我內清淨終不爲彼外災所害彼毒龍者今在鉢中卽便舉鉢以示迦葉迦葉師徒見於沙門處火不燒降伏惡龍置於鉢中歎未

曾有語弟子言年少沙門雖復神通然故不如我道真也

爾時世尊語迦葉言我今方欲停止此處迦葉答言善哉隨意是時如來於第二夜坐一樹下時四天王夜來佛所而共聽法各放光明照踰日月迦葉夜起遙見天光在如來側語弟子言年少沙門亦事於火至明日曉往請佛所問言沙門汝事火也佛言不也有四天王夜來聽法是其光耳於是迦葉語弟子言年少沙門有大神德然故不如我道真也至第三夜釋提桓因來下聽法放太光明如日初昇迦葉弟子



遙見天光在如來側而白師言年少沙門定事火也  
至於明旦往詣佛所問沙門言汝定事火佛言不也  
釋提桓因來下聽法是其光耳于時迦葉語弟子言  
年少沙門神德雖盛然故不如我道真也至第四夜  
大梵天王來下聽法放大光明如日正中迦葉夜起  
見有光明在如來側沙門必定事於火也明旦問佛  
汝定事火佛言不也大梵天主夜來聽法是其光耳  
於是迦葉心自念言年少沙門雖復神妙然故不如  
我道真也爾時迦葉五百弟子各事三火於晨朝時  
俱欲然火火不肯然皆向迦葉具說此事迦葉聞已

心自思惟此必當是沙門所爲即與弟子來至佛所  
而白佛言我諸弟子各事三火旦欲然之而火不然  
佛即答言汝可還去火自當然迦葉便還見火已然  
心自念言年少沙門雖復神妙然故不如我道真也  
諸弟子衆供養火畢而欲滅之不能令滅即向迦葉  
具說此事迦葉聞已心自思惟此亦當是沙門所爲  
即與弟子來至佛所而白佛言我諸弟子朝欲滅火  
而火不滅佛即答言汝可還去火自當滅迦葉便歸  
見火已滅心自念言年少沙門雖復神妙然故不如  
我道真也爾時迦葉自事三火晨朝欲然火不肯然



卽自思惟此必復是沙門所爲卽往佛所而白佛言  
我朝然火而不肯然佛卽答言汝可還去火自當然  
迦葉便歸見火已然心自念言年少沙門雖復神妙  
然故不如我道真也於時迦葉供養火畢而欲滅之  
不能令滅心自思惟此必當是沙門所爲卽往佛所  
而白佛言我朝然火今欲滅之而不肯滅佛卽答言  
汝可還去火自當滅迦葉便歸見火已滅心自念言  
年少沙門雖復神妙然故不如我道真也瑞應不起  
云迦葉復念是大沙門神則神矣然未得道不如我  
得羅漢爾時迦葉諸弟子衆晨朝破薪斧不肯舉卽

向迦葉具說此事迦葉聞已心自思惟此必復是沙  
門所爲卽與弟子來至佛所而白佛言我諸弟子晨  
朝破薪斧不肯舉佛卽答言汝可還去斧自當舉迦  
葉便歸見諸弟子斧皆得舉而自念言年少沙門雖  
復神妙然故不如我道真也迦葉弟子卽得舉斧復  
不肯下還向迦葉具說此事迦葉聞已心自思惟此  
亦當是沙門所爲卽與弟子往至佛所而白佛言我  
諸弟子旦欲破薪斧旣得舉復不肯下佛卽答言汝  
可還去當令斧下迦葉還歸見諸弟子斧皆得下心  
自念言年少沙門雖復神妙然故不如我道真也爾



時迦葉於晨朝時自欲破薪斧不得舉心自思惟此亦當是沙門所爲卽詣佛所而白佛言我旦破薪斧不肯舉佛卽答言汝可還去斧自當舉迦葉旣還斧卽得舉心自念言年少沙門雖復神妙然故不如我道真也迦葉斧旣舉已復不肯下心自思惟此亦當是沙門所爲卽詣佛所而白佛言我斧已舉復不肯下佛卽答言汝可還去斧自當下迦葉卽歸斧卽得下心自念言年少沙門雖復神妙然故不如我道真也爾時迦葉卽白佛言年少沙門夏止住此共修梵行房舍衣食我當相給于時世尊默然許之迦葉知

佛許已還其所住卽勅日日辦好飲食并施牀座至明食時自行請佛佛言汝去我隨後往迦葉適去俄爾之間世尊卽便至閻浮洲界取閻浮果滿鉢持來迦葉未至佛已先到迦葉後來見佛已坐卽便問言年少沙門從何道來而先至此佛以鉢中取閻浮果以示迦葉而語之言汝今識此鉢中果不迦葉答言不識此果佛言從此南行數萬踰閻那彼有一洲其上有樹名曰閻浮緣有此樹故言閻浮提我此鉢中是彼果也於一念頃取此果來極爲香美汝可噉之於是迦葉心自思惟彼道去此極爲長遠而此沙門



乃能俄爾已得還往神通變化殊自迅疾然故不如  
我道真也普曜經云迦葉適去佛以神足上忉利天  
取晝度果神足南行數千萬里極閻浮提界上取訶  
梨勒果餘三天木皆亦如是文多不載迦葉曰從何道來佛言卿每  
去後吾至四域及上忉利天中取此果來香美可食  
卿可食之瑞應本起云明日食時迦葉請佛佛言便  
去今隨後往佛南行極閻浮提界上數千萬里取訶  
梨勒果盛滿鉢還迦葉未歸佛已坐其牀迦葉至問  
何緣先到佛言卿適去我即行此地界取訶梨勒果  
亦香且美便取食之佛飯已去迦葉續念是大沙門

雖神不如我道真也迦葉即便下種種食佛即呪願  
婆羅門法中奉事火為最一切眾流中  
大海為其最於諸星宿中月光為其最  
一切光明中日光為其最於諸福田中  
佛福田為最若欲求大果當供佛福田  
佛食已訖還歸所住洗鉢漱口坐於樹下明日食時  
復往請佛佛言汝去我隨後往迦葉適去俄爾之間  
世尊即便至弗婆提取菴摩羅果滿鉢持來迦葉未  
至佛已先到迦葉後來見佛已坐即便問言年少沙  
門從何道來而先至此佛以鉢中菴摩羅果以示迦



葉而語之言汝今識此鉢中果不迦葉答言不識此  
果佛言從此東行數萬踰闍那到弗婆提取此果來  
名菴摩羅極為香美汝可食之迦葉聞已心自念言  
彼道去此極為長遠而此沙門乃能俄爾已得往還  
觀其神化所未曾有然故不如我道真也迦葉即便  
下種種食佛即呪願

婆羅門法中 奉事火為最 一切眾流中  
大海為其最 於諸星宿中 月光為其最  
一切光明中 日光為其最 於諸福田中  
佛福田為最 若欲求大果 當供佛福田

佛食已畢還歸所止洗鉢漱口坐於樹下明日食時  
復往請佛佛言汝去我隨後往迦葉適去俄爾之間  
世尊便即到瞿陀尼取訶梨勒果滿鉢持來迦葉未  
至佛已先到迦葉後來見佛已坐即便問言年少沙  
門從何道來而先至此佛以鉢中訶梨勒果以示迦  
葉而語之言汝今識此鉢中果不迦葉答言不識此  
果佛言從此西行數萬踰闍那到瞿陀尼取此果來  
名阿梨勒極為香美汝可食之迦葉聞已心自念言  
彼道去此極為長遠而此沙門乃能俄爾已得往還  
觀其神通所未曾有然故不如我道真也迦葉即便



下種種食佛印以曰

婆羅門法中 奉事火爲最 一切衆流中

大海爲其最 於諸星宿中 月光爲其最

一切光明中 日光爲其最 於諸福田中

佛福田爲最 若欲求大果 當供佛福田

佛食已訖還歸所止洗鉢漱口坐於樹下明日食時

復往請佛佛言汝去我隨後往迦葉適去俄爾之間

世尊即便至鬱單越取自然粳米飯滿鉢持來迦葉

未至佛已先到迦葉後來見佛已坐即便問言年

沙門從何道來而先至此佛以鉢中粳米飯以示迦

葉而語之言汝今識此鉢中飯不迦葉答言不識此

飯佛言從此北行數萬踰閼那到鬱單越取此自然

粳米飯來極爲香美汝可食之迦葉聞已心自念言

彼道去此極爲長遠而此沙門乃能俄爾已得往還

雖復神通難可測量然故不如我道真也迦葉即便

下種種食佛印呪曰

婆羅門法中 奉事火爲最 一切衆流中

大海爲其最 於諸星宿中 月光爲其最

一切光明中 日光爲其最 於諸福田中

佛福田爲最 若欲求大果 當供佛福田



佛食畢已還歸所止洗鉢漱口坐於樹下明日食時復往請佛佛言善哉卽共俱行旣到其舍下種種食佛卽呪願

婆羅門法中

奉事火爲最

一切衆流中

大海爲其最

於諸星宿中

月光爲其最

一切光明中

日光爲其最

於諸福田中

佛福田爲最

若欲求大果

當供佛福田

爾時世尊呪願已畢卽便取食獨還樹下食竟心念須水釋提桓因卽知佛意如大壯士屈伸臂頭從天下來到於佛前頭面禮足卽便以手指地成池其水

清涼具八功德如來卽便得而用之澡漱旣畢爲釋提桓因說種種法釋提桓因旣聞法已歡喜踊躍忽然不現還歸天宮是時迦葉於中食後林間經行心自念言年少沙門今日受食還歸樹下我當往彼而看視之卽詣佛所忽見樹側有一大池泉水澄淨具八功德恠而問佛此中云何忽有此池佛卽答言旦受汝供還歸此食食訖須水澡漱洗鉢釋提桓因知我此意從天上來以手指地而成此池爾時迦葉旣見池水復聞佛言心自思惟年少沙門有大威德乃能如此感致天瑞然故不如我道真也







玩切澡手也漱蘇奏切盪口也**髮**薄紅切**展**竭戟切**澀**所立切

歸安居士嚴爾珪捐貲刻此  
釋迦譜卷第四 計字一萬二千四百九十六  
箇該銀六兩二錢四分八厘 伏願  
大根雪淨三障冰清即生啓悟妙心世世弘開  
道眼 龍山釋海瓊對  
崇禎五年孟春月徑山化城寺識



早稲田大学図書館

011488555300